

Repower dovrà nov chapital e novs investurs

Il concern d'energia grischun Repower planisescha ina restructuraziun dal manaschi

DA MARTIN CABALZAR

■ **Il concern Repower duai sa sviluppar d'in'interpresa che producescha e venda energia ad in concern che poscha differents servetschs sin il sector d'energia. Per quest intent duai il chapital d'aczijs vegnir augmentà per almain 150 milliuns. L'augment planisà dal chapital d'aczijs, l'elecziun dal nov cussegl administrativ sco era singulas midadas da las statutas duain vegnir preschentads ad ina radunanza generala extraordinaria che ha lieu ils 21 da zercladur.** En vista vegn prendì da vender differentas participaziuns e da sa concentrar sin ils martgads da l'Italia e da la Svizra. Questa midada da strategia era gia vegnida annunziada il december passà. «Repower duai dentant restar vivand in'interpresa cun fermas ragischs en il Grischun e che offrescha là numerus posts da lavur attractivs, ha punctuà il schef operativ *Kurt Bobst*.

Midada radicala en l'acziunariat

La participaziun dals novs investurs, las Ovras electricas da Turitg ed UBS Clean Energy Infrastructure Switzerland, vegn a midar radicalmain la basa da chapital da Repower. En l'avegnir na duai betg pli il chantun Grischun esser l'acziunari principal, mabain las Ovras electricas da Turitg. Tut tenor la dimensiun ch'ils proprietaris privats fan adiever da lur dretgs da precumpra da novas aczijs vegnan las Ovras electricas da Turitg a disponer d'ina cumpra da 25,9 fin 30,4 per-



Il schef operativ Kurt Bobst (a san.) ed il schef da finanzas Stefan Kessler (a dretga) han orientà davart las midadas da l'acziunariat da Repower.

FOTO O. ITEM

tschient ed il concern Axpo tranter 11,6 e 13,6 pertschient da l'acziunariat. Ils trais ulteriurs acziunaris gronds èn il chantun Grischun cun ina nova cumpra tranter 20,1 e 23,5 pertschient. La UBS-CEIS cun ina cumpra tranter 17,3 e 20,2 pertschient e la Axpo cun tranter 11,6 e 16,6 pertschient.

Nagina influenza sin l'operativa

Sco quei ch'il schef operativ da Repower Kurt Bobst ha ditg a la conferenza da telefon cun las medias rinforzia l'auza dal chapital d'aczijs il concern da Repower en plirs resguards. Cun pustar

Repower sin quatter pilasters saja il concern bain preparà per l'avegnir. Sche tut ils acziunaris dal publicum fan adiever da lur dretg da precumpra da novas aczijs sa il concern disponer da maximal 200 milliuns per far novas investiziuns. La finamira saja d'augmentar l'abilitad d'agir, meglierar successivmain la rentabilitad e d'acquistar novas spartas da fatschenta. La nova direziun strategica lubeschia a Repower da sa profilar sin il martgà d'energia cumpletmain midà sco ferm partenari e cun ina purschida differenziada da servetschs. Il schef da finanzas *Stefan Kessler* ha dentant relativà in zichel,

manegiond che la midada da la structura da l'acziunariat na mainia anc betg ad in meglierament dal resultat operativ. Sco praticamain tut ils concerns d'energia saja era Repower vegnì adina dapli sut squitsch pervi dals bass pretschs sin il martgà d'energia. L'onn passà ha il concern da Repower stuì nudar ina perdita da 136 milliuns.

Mantegnair la stabilitad a lunga vista

Il chantun Grischun sustegna l'augment previ dal chapital d'aczijs per uschia garantir er a lunga vista l'existenza da questa impurtanta interpresa d'energia dal

Grischun. «Il chantun è persuadi che ils dus novs acziunaris cumpletteschan optimalmain l'acziunariat da Repower e rinforzan sia posiziun. Sco il chantun Grischun sustegnan er ils novs acziunaris las finamiras a lung termin da la societad. Qua tras vegn era tschentà in ferm accent per la forza idraulica en noss chantun», uschia cusseglier guvernativ *Mario Cavigelli*, il schef dal departament da construcziun, traffic e selvicultura.

Er il schef operativ da l'Axpo *Andrew Walo* conferma: «L'Axpo ha adina benventà in schlargiament da l'acziunariat da Repower. L'augment planisà dal chapital d'aczijs cun novs partenaris sustegn a moda persistente la strategia da Repower e rinforza l'interpresa.»

Nova cumposiziun dal cussegl d'administraziun

A la radunanza extraordinaria dals 21 da zercladur vegn il cussegl d'administraziun er a proponer ina nova cumposiziun dal cussegl d'administraziun che resplesca la nova structura da participaziun e che corresponda a la nova orientaziun strategica da l'interpresa. En l'avegnir duai il cussegl administrativ sa cumponer da maximal 76 commembers. Ad ina reelecziun renunzian gugent u navidas il parsura *Eduard Rikli*, *Manfred Thumann*, *Rudolf Huber*, *Placi Berther* e *Gerhard Jochum*. A recandidar vegnan cusseglier dals chantuns *Martin Schmid*, ant. cusseglier guvernativ *Claudio Lardi* e *Rolf W. Mathis*. Da nov vegnan proponids *Urs Rengel*, *Roland Leuenberger* e *Peter Eugster*.